

## CELEBRACIÓN EN OS COTOS (na casa)

15 – 16 de agosto do 2020

XX DO TEMPO ORDINARIO



OS COTOS COA IGUALDADE VERDADEIRA DAS PERSOAS,  
COS POBOS QUE SOFREN INJUSTIZA E ABANDONO,  
COS REFUXIADOS E MARXINADOS DA SOCIEDADE,  
E COA NATUREZA MALTRATADA



## 1.- ENCONTRO EN FAMILIA

### SAÚDO DE BENVIDA

🎵 *Amigos nas penas*

**Celebrante:**

Benvidos sexamos todos a esta celebración. Reunímonos para celebrar a fe en familia e na compañía de Xesús. Facémolo no nome do Pai e do Fillo e do Espírito Santo.

A liturxia da Palabra de hoxe abre a nosa conciencia a aceptar a todos como irmáns. No tempo de Xesús os que non eran xudeus estaban excluídos dos bens da salvación, e por iso a muller cananea ten que mostrar a súa fe para poder acercarse a El e facerlle a súa petición.

O evanxeo é para todos, de balde e sen distincións, non unha propiedade particular de ninguén como pretenden algúns. Calquera pode acercarse a el e recibir a boa nova da salvación e do amor de Deus.

Fagamos honra do noso calificativo de “católico” = universal. Saibamos pois compartir a fe con todos, sen mirar a súa cor, ideoloxía, cultura ou procedencia, pois todos estamos chamados a vivir a fe nun mesmo Deus Pai.

Celebremos entón a nosa fe neste fogar acolledor.

## ACTO PENITENCIAL E COMPROMISOS

**Celebrante:** *Xesús dá esperanza a todo o que acude a El, aínda que as veces teña que ir dando pouco a pouco exemplo aos que lle acompañaban e non o entendían. Nós hoxe temos que pedir perdón porque moitas veces non somos acolledores coma El:*

### **Monitor/a**

➤ Pola nosa falta de compaixón e acollida:

**SEÑOR, ENCHE DE VIDA O NOSO CORAZÓN**

➤ Pola nosa incapacidade para entender aos que non pensan coma nós e os rexeitamos

**CRISTO, ENCHE DE VIDA O NOSO CORAZÓN**

➤ Polas nosas actitudes excluíntes e intransixentes ante tantas persoas

**SEÑOR, ENCHE DE VIDA O NOSO CORAZÓN**

**Celebrante:** *Deus todopoderoso teña piedade de nós e dos que teñen lugar á nosa beira. Encha os nosos corazóns de vida e a todos, nos conceda o perdón e nos leve á vida eterna. Amén.*

## ORACIÓN PROPIA DO DÍA

**Celebrante:** *Rematamos a primeira parte da celebración confiando nas mans de Deus Pai a nosa oración e pedimos que ninguén se sinta rexeitado, nin na igrexa nin na sociedade.*

*(silenzo)*

Deus, noso Pai, ti, que preparaches bens para aqueles que te aman, enche os nosos corazóns co teu amor. Fai que amándote a ti en todo e sobre todo, academos as túas promesas de paz, que superan todas as fronteiras.

Pedímoscho polo mesmo Xesucristo, noso Señor. Amén.

## 2.- PROCLAMACIÓN DA PALABRA DE DEUS

*(sentad@s)*

**Monitor/a:** *A persoa de Xesús atraía a todos os que necesitaban axuda, consolo ou esperanza, e El atendía a todos sabendo dar a cada quen o que precisaba.*

*Que nós aprendamos a ser acolledores para poder facer vivo o seu Evanxeo nunha sociedade e nunha igrexa que moitas veces segue a excluír á muller.*

Leccionario I A páx 238 Is 56,1.6-7 LECTURA

### **LECTURA DO PROFETA ISAÍAS**

**Di Así fala o Señor:**

**cumpride o dereito e practicade a xustiza, que a miña salvación está próxima a chegar e a miña xustiza (está próxima) a mostrarse. E aos fillos de estranxeiro que se apegan ao Señor, servindo e amando o Nome do Señor, sendo os seus servos,**

a todo o que garde o sábado sen profanalo  
e aos que se manteñan firmes na miña Alianza,  
traeremos ao meu monte santo  
e alegraremos na miña casa de oración.  
Os seus holocaustos e os seus sacrificios  
servirán de ofrenda de amor sobre o meu altar.

### Palabra do Señor

♪ nº 50 Na tardiña baixa da vida

SALMO

(en pé) Leccionario I A páx 240 Mt 15, 21-28 EVANXEO

## PROCLAMACIÓN DO SANTO EVANXEO SEGUNDO MATEO

Daquela foi Xesús para a comarca de Tiro e Sidón. E apareceu unha muller cananea daqueles contornos, que berraba:

-Compadécete de min, Señor, Fillo de David: a miña filla está atormentada por un demo.

Pero el non respondeu palabra. Achegándoselle os seus discípulos, rogábanlle:

-Espídea, que vén berrando detrás de nós.

El contestoulles:

-Non fun enviado máis que ás ovellas extraviadas da casa de Israel.

Pero ela alcanzounos e, prostrándose, suplicoulle:

-¡Señor, váleme!

El respondeulle:

-Non é ben quitarlle o pan aos fillos para llelo botar aos cadelos.

Pero ela contestou:

-Non é, Señor, non; pero tamén os cadelos comen das migallas que caen da mesa dos seus amos.

Entón respondeulle Xesús:

-¡Muller, a túa fe é ben grande: fágase, logo, como desexas!

E a súa filla ficou sa naquela hora.

### Palabra do Señor

(sentad@s)

gardamos uns instantes de silencio para acoller a palabra no corazón



(en pé)

## PROFESIÓN DA FE

**Celebrante:** *Nesta celebración na casa, deixándonos guiar por Xesús na nosa oración e sabendo que Deus está aquí connosco, proclamamos a fe que nos une en familia e fogar:*

***Creo, Señor, pero aumenta a miña fe***

### ***Monitor/a***

*Credes en Deus, no Deus que nos creou á súa imaxe e que nos ama, nos acolle e nos convida a vivir sendo acolledores con todos?*

***Creo, Señor, pero aumenta a miña fe***

*Credes en Xesús, que quixo compartir a nosa vida, que o fixo sentíndose irmán con todos, e que con palabras e feitos escoita os berros dos homes e mulleres que son asoballados e desprezados?*

***Creo, Señor, pero aumenta a miña fe***

*Credes no Espírito Santo, que nos alenta a acoller sen facer diferenzas por pensar, crer ou vivir de xeito diferente?*

***Creo, Señor, pero aumenta a miña fe***

*Credes na igrexa, comunidade que acolle e non rexeita, que ten compaixón e non asoballa?*

***Creo, Señor, pero aumenta a miña fe***

## ORACIÓN UNIVERSAL

**Celebrante:** *Movidos pola fe, seguindo o exemplo de Xesús, hoxe queremos acoller o berro dos que son desprezados e inxustamente tratados na nosa sociedade, e facémolo dicindo:*

**Señor, ten compaixón**

### ***Monitor/a***

- 1. Polas persoas tratadas con desprezo e polas que ninguén quere escoitar, oremos*
- 2. Polas mulleres que sofren violencia de xénero e as que viven con medo, oremos*
- 3. Polos nenos abandonados, refuxiados, e sen futuro, oremos*
- 4. Polas persoas que non están sendo responsables nestes tempos de pandemia, e teñen actitudes pouco coidadoras cos demais, oremos*
- 5. Polas persoas que berran pedindo xustiza e polas que son relegadas na nosa sociedade, oremos*
- 6. Polas persoas maiores, polas enfermas e encamadas, polas que sofren en soidade, oremos*

**Celebrante:** *Grazas Señor porque hoxe coa nosa oración comprometémonos a dar unha man para facer crible o evanxeo de Xesús, noso Señor que vive e reina por sempre eternamente. Amén.*

### 3.- OS SIGNOS DA COMUNIÓN CON DEUS EN FAMILIA

#### NOSO PAI

**Celebrante:** *A Deus descubrímolos sobre todo nas persoas que sofren como nos mostrou a Madre Teresa, ou Pedro Casaldáliga. Hoxe que as temos presentes na nosa celebración queremos berrar con elas:* NOSO PAI ...

#### SIGNO DA PAZ

**Celebrante:** *Non pode haber paz nunha sociedade que exclúe a algúns dos seus membros ou non os acepta. Que dende este fogar, coa nosa vida e co noso xeito de vivir, sexamos acolledores e así poidamos facernos transmisores de paz para todos.*

#### NON COMULGAMOS PERO ESTAMOS EN COMUNIÓN

**Celebrante:** *Xesús acóllenos a todos sen distincións de persoas. Como El dicía “Deus fai saír o sol sobre bos e malos”.*

*Ditosos nós que hoxe coma fogar sentímonos enviados por El a ser acolledores con todos para facer realidade o seu Reino.*

 **Acharte presente na vida**

### 4.- AVISOS E DESPEDIDA

#### ORACIÓN FINAL

#### **Celebrante:**

Oremos:

Señor, por esta celebración farnos participar na vida de Cristo.

Que a túa bondade nos faga semellantes a el na terra, para que poidamos participar da súa gloria no ceo.

Pedímoscho por Xesucristo, o teu fillo benquerido, que vive e reina con nós por sempre eternamente. Amén.

*Como Xesús escoitando o berro da muller cananea, temos a responsabilidade de escoitar a voz das desprezadas e rexeitadas pola sociedade.*

*con Xesús aprendemos a ser acolledores e transmisores de esperanza,*

*como Xesús vivamos dende a tolerancia e o respecto con quen pensa, cre ou vive diferente, e sempre asumindo a nosa responsabilidade persoal ante a pandemia.*

***Que teñamos un bo día, unha boa semana,  
e o Señor nos bendiga, † nos garde de todo mal  
e nos leve ao seu fogar de vida eterna. Amén.***



“Xesús díxolle á muller:  
-Non é ben quitarlle o pan aos fillos para llelo botar aos cadelos.  
Pero ela contestou:  
-Non é, Señor, non; pero tamén os cadelos comen das migallas que caen da mesa dos seus amos.  
Entón respondeulle Xesús:  
-¡Muller, a túa fe é ben grande!”

*Palabras do evanxeo de hoxe*

